

摘藻堂四庫全書薈要

集部

欽定四庫全書薈要卷一萬九千七百八十四

集部

樂府詩集卷七十一

宋 郭茂倩 編

雜曲歌辭

行路難三首

李白

金樽清酒斗十千玉盤珍羞直萬錢
停杯投筯不能食拔劍四顧心茫然
欲渡黃河冰塞川將登太行雪暗天
間來垂釣坐溪上忽復乘舟夢日邊
行路難行路難多

歧路今安在長風破浪會有時直挂雲帆濟滄海

大道如青天我獨不得出羞逐長安社中兒赤雞白狗

一作雉賭梨栗彈劍作歌奏苦聲曳裾王門不稱情淮陰

市井笑韓信漢朝公卿忌賈生君不見昔時燕家重郭

隗擁篲折腰一作節無嫌猜劇辛樂毅感恩分輸肝剖膽

効英才昭王白骨縈蔓草誰人更掃黃金臺行路難歸

去來

有耳莫洗潁川水有口莫食首陽蕨含光混世貴無名

何用孤高比雲月吾觀自古賢達人功成不退皆殞身
子胥既棄吳江上屈原終投湘水濱陸機才多豈自保
李斯稅駕苦不早華亭鶴唳詎可聞上蔡蒼鷹何足道
君不見吳中張翰稱一作真達士秋風忽憶江東行且樂
生前一杯酒何須身後千載名

同前三首

顧況

君不見古來燒水銀變作北邙山上塵藕絲挂身在虛
空欲落不落愁殺人睢水英雄多血刃建章宮闕成灰

燼淮王身死桂枝折徐氏一去音書絕行路難行路難
生死皆由天秦皇漢武遭下脫汝獨何人學神仙

君不見不見擔雪塞井徒用力炊砂作飯豈堪喫一生肝膽
向人盡相識不如不相識冬青樹上挂凌霄歲晏花凋
樹不彫凡物各自有根本種禾終不生豆苗行路難行
路難何處是平道中心無事當富貴今日覺君顏色好
君不見少年頭上如雲髮少壯如雲老如雪豈知灌頂
有醍醐能使清涼頭不熱呂梁之水挂飛流黿鼉蛟蜃

不敢游少年恃險若平地獨倚長劒凌清秋行路難行
路難昔少年今已老前朝竹帛事皆空日暮牛羊古城
草

同前

李頎

漢家名臣楊德祖四代五公享茅土父兄子弟綰銀黃
躍馬鳴珂朝建章火浣單衣繡方領茱萸錦帶玉盤囊
賓客填街復滿座片言出口生輝光世人逐勢爭奔走
漑膽隳肝唯恐後當時一顧生青雲自謂生死長隨君

一朝謝病還鄉里窮巷蒼茫絕知己秋風落葉閉重門
昨日論交竟誰是薄俗嗟嗟難重陳深山麋鹿下為隣
魯連所以蹈滄海古往今來稱達人

同前二首

高適

君不見富家翁昔時貧賤誰比數一朝金多結豪貴萬
事勝人健如虎子孫成長滿眼前妻能管絃妾能舞自
矜一朝忽如此卻笑傍人獨悲一作愁苦東隣少年安所

如席門窮巷出無車有才不肯學干謁何用年年空讀

書

長安少年不少錢，能騎駿馬鳴金鞭。
五侯相逢大道邊，美人弦管爭留連。
黃金如斗不敢惜，片言如山莫棄捐。
安知顛顚讀書者，莫宿虛臺私自憐。

同前

張籍

湘東行人長歎息，十年離家歸未得。
弊裘羸馬苦難行，僮僕飢寒少筋力。
君不見牀頭黃金盡，壯士無顏色。
龍蟠泥中未有雲，不能生彼昇天翼。

同前

聶夷中

莫言行路難夷狄如中國謂言骨肉親中門如異域出處全在人路亦無通塞門前兩條轍何處去不得

同前

韋應物

荆山之白玉兮良工凋琢雙環連月蝕中央鏡心穿故人贈妾初相結恩在環中尋不絕人情厚薄苦須臾昔似連環今似玦連環可碎不可離如何物在人自移上客勿遽歡聽妾歌路難傍人見環環可憐不知中有長

恨端

同前三首

柳宗元

君不見夸父逐日窺虞淵
跳踉北海超崑崙披霄決漢
出沆漭瞥裂左右遺星辰
須臾力盡道渴死孤鼠蜂蟻
爭噬吞北方竚人長九寸
開口抵掌更笑喧啾啾飲食
滴與粒生死亦足終天年
睢盱大志少成遂坐使兒女
相悲憐

虞衡斤斧羅千山工命採斫杙與椽
深林土翦十取一

百牛連鞅推雙轅萬圍千尋妨道路東西蹶倒山火焚
遺餘毫末不見保蹢躅礪壑何當存羣材未成質已夭
突兀崿豁空岳巒柏梁天災武庫火匠石狼顧相愁冤
君不見南山棟梁益稀少愛材養育誰復論

飛雪斷道冰成梁侯家熾炭雕玉房蟠龍吐耀虎喙張
熊蹲豹躑爭低昂攢巒藂嶂射朱光丹霞翠霧飄奇香
美人四向迴明璫雪山冰谷晞太陽星躔奔走不得止
奄忽雙鸞棲虹梁風臺露榭生光飾死灰棄置參與商

盛時一去貴反賤桃笙葵扇安可常

同前

鮑溶

玉堂向夕如無人絲竹儼然宮商死細人何言入君耳
塵生金樽酒如水君今不念歲蹉跎雁天明明涼露多
華燈青凝久照夜綵童窈窕虛垂羅入宮見妬君不察
莫入此地出風波此時不樂早休息女顏易老君如何

同前五首

僧貫休

不會當時

一作初

作天地剛有多般愚與智到頭還用真

宰心何如上下皆清氣大道冥冥不知處那堪頓得義
和轡義不義兮仁不仁擬學長生更容易負心為爐復
為火緣木求魚應且止君不見燒金煉石古帝王鬼火
熒熒白楊裏

君不見道傍廢井生古木本是驕奢貴人屋幾度美人
照影來素綆銀瓶濯纖玉雲飛雨散今如此繡闥雕甍
作荒谷沸渭笙歌君莫誇不應長是西家哭休說遺編
行者幾至竟終須合天理敗他成此亦何功蘇張終作

多言鬼行路難行路難不在羊腸裏

九有茫茫堯堯日浪死虛生亦非一清淨玄音竟不聞
花眼酒腸暗如漆或偶因片言隻字登第光二親又不
能獻可替不航要津口談義軒與周孔履行不及屠沽
人行路難行路難日算途遠空悲歎

君不見道傍樹有寄生枝青青鬱鬱同榮衰無情之物
尚如此為人不及還堪悲父歸墳兮未朝夕已分黃金
爭田宅高堂老母頭似霜心作數支淚常滴我聞忽如

負芒刺不獨為君空歎息古人尺布猶可縫得陽義大
令人憶寄言世上為人子孝義團圓莫如此若如此不
遑死兮更何俟

君不見山高海深人不測古往今來轉青碧淺近輕浮
莫與交池一作地卑只解生荆棘誰道黃金如糞土張耳

陳餘斷消息行路難行難君自看

同前二首

僧齊已

行路難君好看驚波不在黥黥間小人心裏藏崩湍七

盤九折寒嶠崒翻車倒蓋猶堪出未似是非脣舌危閣
中潛毀平人骨君不見楚靈均千古沉冤湘水濱又不
見李太白一朝卻作江南客

下浸與高盤不為行路難是非真險惡翻覆作峰巒漆
媿同時黑朱慚巧處丹令人畏相識欲畫白雲看

同前

翁綬

行路艱難不復歌故人榮達我蹉跎雙輪晚上銅梁一作

臺雪一葉春浮瘴海波自古要津皆若此方今失路欲

如何君看西漢翟丞相鳳沼朝辭算崔羅

同前

辭能

何處力堪殫人心險萬端藏山難測度暗水自波瀾對
面如千里迴腸似七盤已經吳坂困欲向雁門難南北
誠須泣高深不可干無因善行止車轍得平安

從軍中行路難二首

駱賓王

君不見封狐雄虺自成羣馮深負固結妖氛玉璽分別
徵惡少金壇受律動將軍將軍擁旄宣廟略戰士橫行

靜夷落長驅一息背銅梁直指三巴逾劔閣閣道峿
上戍樓劔門遙裔俯靈丘邛關九折無平路江水雙源
有急流征役無期返他鄉歲華晚杳杳丘陵出蒼蒼林
薄遠途危紫蓋峰路澀青泥坂去去指哀牢行行入不
毛絕壁千里險連山四望高中外分區宇夷夏殊風土
交趾枕南荒昆彌臨北戶川源饒毒霧溪谷多淫雨行
潦四時流崩查千歲古漂梗飛蓬不自安捫藤引葛度
危巒昔時聞道從軍樂今日方知行路難蒼江綠水東

流駛炎洲丹徼南中地南中南斗映星河秦川秦塞阻
烟波三春邊地風光少五月瀘中瘴癘多朝驅疲斥候
夕息倦誰何向月彎繁弱連星轉太阿重義輕生懷一
顧東伐西征凡幾度夜夜朝朝班鬢新年年歲歲戎衣
故灞城隅滇池水天涯望轉積地際行無已徒覺炎涼
節物非不知關山千萬里棄置勿重陳重陳多苦辛且
悅清笳楊柳曲詎憶芳園桃李人絳節朱旗分白羽丹
心白刃酬明主但令一技君王識誰憚三邊征戰苦行

路難行路難歧路幾千端無復歸雲馮短翰望日想長
安

君不見玉關塵色暗邊亭銅鞮雜虜寇長城天子按劍
徵餘勇將軍受脤事橫行七德龍韜開玉帳千里鼙鼓
疊金鉦陰山苦霧埋高壘交河孤月照連營去去無窮
極擁旆遙遙過絕國陣雲朝結晦天山寒沙夕漲迷踈
勒龍鱗水上開魚貫馬首山前振鵬翼長驅萬里讐祁
連分麾三命武功宣百發烏號遙碎柳七尺龍交迴照

蓮春來秋去移灰琯
蘭閨柳市芳塵斷
雁門迢遞尺書稀
鴛被相思雙帶緩
行路難誓令氛祲靜
皋蘭但使封侯龍
額貴詎隨中婦鳳
樓寒

變行路難

向晚橫吹悲風動
馬嘶合前驅引旗

一作旌

節千里陣雲

弔單于下陰山
砂礫空颯颯封侯取一戰
豈復念閨閣

古別離

江淹

楚辭曰悲莫悲兮生別離
古詩曰行行重

行行與君生別離相去萬餘里各在天一
涯後蘇武使匈奴李陵與之詩曰良時不
可再離別在須臾故後人擬之為古別離
梁簡文帝又為生別離宋吳邁遠有長別
離唐李白有遠別離亦皆類此

遠與君別者乃至雁門關黃雲蔽千里遊子何時還送
君如昨日簷前露已團不惜蕙草晚所悲道里寒君在
天一涯妾身長別離願一見顏色不異瓊樹枝兔絲及

水萍所寄終不移

同前

沈佺期

白水東悠悠中有西行舟
舟行有返棹水去無還流
奈何生別者戚戚懷遠遊
遠遊誰當惜所悲會難收
自君聞芳躡青陽四五道
皓月掩蘭室光風虛蕙樓
相思無明晦長歎累冬秋
離居分遲暮高駕何淹留

同前

孟雲卿

朝日上高臺離人怨秋草
但見萬里天不見萬里道
君

行本遙遠苦樂良難保宿昔夢同衾憂心夢顛倒含酸
欲誰訴轉轉傷懷抱結髮年已遲征行去何早寒暄有
時謝顛顛難再好人皆算年壽死者何曾老少壯無見
期水深風浩浩

同前

李益

雙劍欲別風

一作心

淒然雌沉水底雄上天江迴漢轉兩

不見雲交雨合知何年古來萬事皆由命何用臨涕苦
相連

同前二首

于 濟

入室少情意出門多路歧黃鶴有歸日蕩子無還時人
誰無分命妾身何太奇君為東南風妾作西北枝青樓
隣里婦終年畫長眉自倚對良匹笑妾空羅幃

卽本東家兒妾本西家女對門中道間終謂無離阻豈
知中道間遣作空閨主自是愛封侯非關備胡虜知子
去從軍何處無良人

同前二首

李 端

水國葉黃時洞庭霜落夜行舟聞商估宿在楓林下此地送君還茫茫似夢間後期知幾日前路轉多山巫峽通湘浦迢迢隔雲雨天晴見海檣月落聞津鼓人老自多愁水深難急流清宵歌一曲白首對汀洲

與君桂陽別令君岳陽待後事忽差池前期日空在木落雁嗷嗷洞庭波浪高遠山雲似蓋極浦樹如毫朝發能幾里莫來風又起如何兩處愁皆在孤舟裏昨夜天月明長川寒且清菊花開欲盡薺菜泊來生下江帆勢

連五兩遙相逐欲問去時人知投何處宿空令猿嘯時
泣對湘潭竹

同前

王 縉

下階欲離別相對映蘭麝含辭未及吐淚落蘭麝中
堂靜秋日羅衣飄算風誰能待明月迴首見牀空

同前

僧皎然

太湖三山口吳王在時道寂寞千載心無人見春草誰
堪緘怨者持此傷懷抱孤舟畏狂風一點宿烟島望所

思兮若何月蕩漾兮空波雲離離兮北斷雁眇眇兮南
多身去兮天畔心折兮湖岸春山胡為兮塞路使我歸
夢兮撩亂

同前

聶夷中

欲別牽郎衣問郎遊何處不恨歸日遲莫向臨邛去

同前二首

施肩吾

古人謾歌西飛燕十年不見狂夫面三更風作切夢刀
萬轉愁成繫腸線所嗟不及牛女星一年一度得相見

老母別愛子少妻送征郎血流既四面乃亦斷二腸不
愁寒無衣不怕飢無糧惟恐征戰不還鄉母化為鬼妻
為孀

同前

吳融

紫燕黃鸝雖別離一舉千里何難追猶聞啼風與叫月
流連斷續令人悲賦情更有深繾綣碧甃千尋尚為淺
蟾蜍正向清夜流蛺蝶須教墮絲罥莫道斷絲不可續
丹穴鳳凰膠不遠草草通流水不迴海上兩潮長自返

樂府詩集卷七十一



總校官進士臣胡榮
校對官待詔臣胡士震
謄錄貢生臣王詢

欽定四庫全書薈要

集部

樂府詩集卷七十四

二至

詳校官候選知縣臣吳甸華

欽定四庫全書薈要卷一萬九千七百八十五

集部

樂府詩集卷七十二

宋 郭茂倩 編

雜曲歌辭

古離別

王 適



昔歲驚楊柳高樓悲獨守今年芳樹枝孤棲怨別離珠
簾晝不卷羅幔曉長垂苦調琴先覺愁容鏡獨知頻來
雁度無消息罷去鴛文何用織夜還羅帳空有情春著

裙腰自無力青軒桃李落紛紛紫庭蘭蕙日氛氲已能
顚顚今如此更復含情一待君

同前

常理

君御狐白裘妾居絳綺幃粟鈿金夾膝花錯玉搔頭離
別生庭草征行斷戍樓蠨蛸網清曙菡萏落紅秋小膽
空房怯長眉滿鏡愁為傳兒女意不用遠封侯

同前

姚係

涼風已嫋嫋露重木蘭枝獨上高樓望行人遠不知輕

寒入洞戶明月滿秋池鷺去鴻方至年年是別離

同前二首

趙微明

離別無遠近事歡情亦悲不聞車輪聲後會將何時去
日忘寄書來日乖前期縱知明當還一夕千萬思
違別未幾日一日如三秋猶疑望可見日日上高樓唯
見分手處白蘋滿芳洲寸心寧死別不忍生離愁

同前二首

孟郊

松山雲繚繞萍路水分離雲去有歸日水分無合時春

芳役雙眼春色柔
四支楊柳織別愁
千條萬條絲
山川古今路縱橫
無斷絕來往天地間
人皆有離別行
衣未束帶中腸已先結
不用看鏡中自知生白髮
欲陳去留意聲向言前
咽愁結填心胸
茫茫若為說
荒郊煙莽蒼曠野風淒切
處處得相隨
人那不如月

同前

西江上風動麻姑嫁時浪
西山為水水為塵
不是人間離別人

同前

僧貫休

離恨如旨酒古今飲皆醉只恐長江水盡是兒女淚伊
余非此輩送人空把臂他日再相逢清風動天地

同前

韋莊

晴煙漠漠柳毵毵不那離情酒半酣更把馬鞭雲外指
斷腸春色在江南

生別離

梁簡文帝

離別四弦聲相思雙笛引一去十三年復無好音信

同前

孟雲卿

結髮生別離相思復相保何知日已久五變庭中草眇眇天海途悠悠吳江島但恐不出門出門無遠道遠道行既難家貧衣服單嚴風吹積雪晨起鼻何酸人生各有戀一作志豈不懷所安分明天上日生死誓同歡

同前

白居易

食藥不易食梅難藥能苦兮梅能酸未如生別之為難苦在心兮酸在肝晨雞載鳴殘月沒征馬重一作連嘶行

人出迴看骨肉哭一聲梅酸蘖苦甘如蜜黃河水白黃
雲秋行人河邊相對愁天寒野曠何處宿棠梨葉戰風
颼颼生離別生離別憂從中來無斷絕憂積一作心勞
血氣衰末年三十生白髮

長別離

吳邁遠

生離不可聞況復長相思如何與君別當我少年時蕙
華每搖蕩妾心長一作空自持榮乏草木懽悴極霜露悲

富貴貌一作身難變貧賤顏易衰持此斷君腸君亦宜自

疑淮陰有逸將析羽不曾飛楚有扛鼎士出門不得歸
正為隆準公仗劍入紫微君才定何如白日下爭暉

遠別離

李白

遠別離古有黃英之二女乃在洞庭之南瀟湘之浦海
水直下萬里深誰人不言此離苦日慘慘兮雲冥冥猩
猩啼煙兮鬼嘯雨我縱言之將何補皇穹竊恐不照余
之忠誠雷馮馮兮欲吼怒堯舜當之亦禪禹君失臣兮
龍為魚權歸臣兮鼠變虎或云堯幽囚舜野死九疑聯

綿皆相似重瞳孤墳竟何是帝子泣兮綠雲間隨風波
兮去無還慟哭兮遠望見蒼梧之深山蒼梧山崩湘水
絕竹上之淚乃可滅

同前

張籍

蓮葉團團杏花折長江鯉魚鰭鱗赤念君少年棄親戚
千里萬里獨為客誰言遠別心不易天星墜地能為石
幾時斷得城南陌勿使居人有行役

同前二首

令狐楚

楊柳黃金穗
梧桐碧玉枝
春來消息斷
早晚是歸時
玳織鴛鴦履
金裝翡翠簪
畏人相問著
不擬到城南

久別離

李白

別來幾春未還家
玉窗五見櫻桃花
況有錦字書開緘
使人嗟至此腸斷
彼心絕雲鬢綠鬢
罷攬一作流結愁如

迴飈亂白雪
去年寄書報陽臺
今年寄書重相催
胡為東風為我吹
行雲使西來
待來竟不來
落花寂寂委青

苔

新別離

戴叔倫

手把杏花枝，未曾經別離。
黃昏掩閨後，寂寞自心知。

今別離

崔國輔

送別未能旋相望，連水口船行欲映舟。
幾度急搖手，

暗別離

劉氏瑤

槐花結子桐葉焦，單飛越鳥啼青霄。
翠軒輾雲輕遙遙，燕脂淚迸紅線條。
瑤草歇芳心耿耿，玉珮無聲畫屏冷。
朱弦暗斷不見人，風動花枝月中影。
青鸞脉脉西飛去，

海濶天高不知處

潛別離

白居易

不得哭潛別離不得語暗相思
兩心之外無人知深籠
夜銷獨棲鳥利劍春斷連理枝
河水雖濁有清日烏頭
雖黑有白時唯有潛離與暗別
彼此甘心無後期

別離曲

張籍

行人結束出門去馬蹄幾時踏門路
憶昔君初納綵時
不言身屬邊陽戍早知今日當別離
成君家計良為誰

男兒生身自有役那得悞我少年時不如逐君征戰死
誰能獨老空閨裏

同前

陸龜蒙

丈夫非無淚不灑離別間仗劍對樽酒恥為游子顏蝮
虵一螫手壯士疾解腕所思在功名離別何足歎

西洲曲

古辭

憶梅下西洲折梅寄江北單衫杏子紅雙鬢鵝鵲色西
洲在何處兩漿橋頭渡日暮伯勞飛風吹烏臼樹樹下

即門前門中露翠鈿開門即不至出門採紅蓮採蓮南
塘秋蓮花過人頭低頭弄蓮子蓮子青如水置蓮懷袖
中蓮心徹底紅憶即即不至仰首望飛鴻鴻飛滿西洲
望即上青樓樓高望不見盡日欄干頭欄干十二曲垂
手明如玉卷簾天自高海水搖空綠海水夢悠悠君愁
我亦愁南風知我意吹夢到西洲

同前

一作西
州詞

溫庭筠

悠悠復悠悠昨日下西洲西洲

一作
州

風色好遙見武昌

樓武昌何鬱鬱儂家定無匹小婦被流黃登樓撫瑤瑟
朱弦繁復輕素手直淒清一彈三四解掩抑似含情南
樓登且望西江廣復平艇子搖兩槳催過石頭城門前
烏臼樹慘澹天將曙鷓鴣一作鵝飛復還即隨早帆去迴
頭語同伴定復負情儂去帆不安幅作抵使西風他日
相尋索莫作西洲客西洲人不歸春草年年碧

荊州樂

宗 共

荊州樂蓋出於清商曲江陵樂荊州即江

陵也有紀南城在江陵縣東梁簡文帝荆
州歌云紀城南里望朝雲雉飛麥熟妾思
君是也又有紀南歌亦出於此

迢遞樓雉懸參差臺觀雜城闕自相望雲霞紛颯沓

同前

李白

白帝城邊足風波瞿塘五月誰敢過
荆州麥熟蠶成蛾
綵絲憶君頭緒多撥穀飛鳴奈妾何

同前二首

劉禹錫

渚宮楊柳暗麥城朝雉飛可憐踏青伴乘暖著輕衣
今日好南風商旅相催發沙頭檣竿上始見春江闊

荊州泊

李端

南樓西下時月裏聞來棹桂水舳艫回荊州津濟開移
帷望星漢引帶思容貌今夜一江人唯應妾身覺

紀南歌

劉禹錫

酈道元水經注曰楚之先僻處荆山後遷
紀郢即紀南城也十道志曰昭王十年吳

通漳水灌紀南城入赤湖郢城遂破杜預
左傳注曰今南郡江陵縣北紀南城故楚
國也

風煙紀南城塵土荆門路天寒多獵騎走上樊姬墓

宜城歌

劉禹錫

通典曰宜城楚之鄢都謂之郢有蠻水又
有漢宜城縣在今縣南舊名率道天寶中
改焉十道志曰宜城漢縣宋孝武大明元

年以邊人流寓者立華山郡於大堤村古
名上供梁為率道俗呼大堤其地出美酒
故曰宜城竹葉酒也

野水遶空城行塵起孤驛花臺側生樹石碣陽鐫額靡
靡度行人溫風吹宿麥

南郡歌

陸厥

江南可採蓮蓮生荷已大旅雁向南飛浮雲復如蓋望
美積風露疎麻成襟帶雙珠惑漢皋蛾眉迷下蔡玉齒

徒粲然誰與啓含貝

長干曲

古辭

逆浪故相邀菱舟不怕搖妾家楊子住便弄廣陵潮

同前四首

崔顥

君家定何處妾住在橫塘停舟暫借問或恐是同鄉
家臨九江水去來九江側同是長干人生小不相識
下渚多風浪蓮舟漸覺稀那能不相待獨自逆潮歸
三江潮水急五湖風浪湧由來花性輕莫畏蓮舟重

長干行二首

李白

妾髮初覆額折花門前劇即騎竹馬來遶牀弄青梅同

居長千里兩小無嫌猜十四為君婦羞顏尚不一作開

低頭向暗壁千喚不一迴十五始展眉願同塵與灰常

存抱柱信豈一作恥上望夫臺十六君遠行瞿塘濫預堆

五月不可觸猿鳴一作聲天上哀門前遲一作舊行跡一一

生一作苔苔苔深不能掃落葉秋風早八月蝴蝶來雙

飛西園草感此傷妾心坐愁紅顏老早晚下三巴預將

書報家相迎不道遠直至長風沙

憶妾

一作昔

深閨裏煙塵不曾識嫁與長干人沙頭候風

色五月南風興思君在

一作下

巴陵八月西風起想君發

楊子去來悲如何見少別離多湘潭幾日到妾夢越風

波昨夜狂風度吹折江頭樹淼淼暗無邊行人在何處

北客真王公朱衣滿江中日莫來投宿數朝不肯東好

乘浮雲驄佳期蘭渚東鴛鴦綠浦上翡翠錦屏中自憐

十五餘顏色桃李紅那作商人婦愁水復愁風

同前

張潮

壻貧如珠玉壻富如埃塵貧時不忘舊富貴多寵新妾
本富家女與君為偶匹惠好一何深中門不曾出妾有
繡衣裳歲縫金鏤光念君貧且賤易此從遠方遠方三
千里發去悔不已日莫情更來空望去時水孟夏麥始
秀江上多南風商賈歸欲盡君今尚巴東巴東有巫山
窈窕神女顏常恐遊此山果然不知還

小長干曲

崔國輔

月暗送湖風相尋路不通
菱歌唱不輟知在此塘中

樂府詩集卷七十二

欽定四庫全書薈要卷一萬九千七百八十六

集部

樂府詩集卷七十三

宋 郭茂倩 編

雜曲歌辭

杞梁妻

吳邁遠

崔豹古今注曰杞梁妻者杞殖妻妹朝日之所作也殖戰死妻曰上則無父中則無夫下則無子人生之苦至矣乃抗聲長哭

杞都城感之而頽遂投水而死其妹悲姊
之貞乃作歌名曰杞梁妻焉梁殖之字也
列女傳曰齊莊公襲莒殖戰而死其妻無
所歸乃就其夫之尸於城下而哭十日而
城為之崩既葬遂赴淄水而死琴操曰杞
梁妻嘆齊杞梁殞其妻之所作也

燈竭從初明蘭凋猶早薰扼腕非一代千載炳遺文貞
夫淪莒役杜弔結齊君驚心眩白日長洲崩秋雲精微

貫穹旻高城為隕墳行人既迷徑飛鳥亦失羣壯哉金石軀出門形影分一隨塵壤消聲譽誰共論

同前

僧貫休

秦之無道兮四海枯築長城兮遮北胡築人築土一萬里杞梁貞婦啼嗚嗚上無父兮中無夫下無子兮孤復孤一號城崩塞色苦再號杞梁骨出土疲魂飢魄相逐歸陌上少年莫相非

董嬌饒

宋子侯

洛陽城東路桃李生路傍花花自相對葉葉自相當春
風東北起花葉正低昂不知誰家子提籠行採桑纖手
折其枝花落何飄颻請謝彼妹子何為見損傷高秋八
九月白露變為霜終年會飄墮安得久馨香秋時自零
落春月復芬芳何時盛年去懽愛永相忘吾欲竟此曲
此曲愁人腸歸來酌美酒挾瑟上高堂

焦仲卿妻

古辭

焦仲卿妻不知誰氏之所作也其序曰漢

求建安中廬江府小吏焦仲卿妻劉氏為
仲卿母所遣自誓不嫁其家逼之乃沒水
而死仲卿聞之亦自縊於庭樹時人傷之
而為此辭也

孔雀東南飛五里一徘徊十三能織素十四學裁衣十
五彈箜篌十六誦詩書十七為君婦心中常苦悲君既
為府吏守節情不移雞鳴入機織夜夜不得息三日斷
五匹大人故嫌遲非為織作遲君家婦難為妾不堪驅

使徒留無所施便可白公姥及時相遣歸府吏得聞之
堂上啓阿母兒已薄祿相幸復得此婦結髮同枕席黃
泉共為友共事二三年始爾未為久女行無偏斜何意
致不厚阿母謂府吏何乃太區區此婦無禮節舉動自
專由吾意久懷忿汝豈得自由東家有賢女自名秦羅
敷可憐體無比阿母為汝求便可速遣之遣去慎莫留
府吏長跪告伏惟啓阿母今若遣此婦終老不復取阿
母得聞之槌牀便大怒小子無所畏何敢助婦語吾已

失恩義會不相從許府吏默無聲再拜還入戶舉言謂
新婦哽咽不能語我自不驅卿逼迫有阿母卿但暫還
家吾今且報府不久當歸還還必相迎取以此下心意
慎勿違吾語新婦謂府吏勿復重紛紜往昔初陽歲謝
家來貴門奉事循公姥進心敢自專晝夜勤作息伶俜
縈苦辛謂言無罪過供養卒大恩仍更被驅遣何言復
來還妾有繡腰襦歲時自生光紅羅複斗帳四角垂香
囊箱簾六七十綠碧青絲繩物物各自異種種在其中

人賤物亦鄙不足迎後人留待作遣施於今無會因時
時為安慰久久莫相忘雞鳴外欲曙新婦起嚴妝著我
繡袂裙事事四五通足下躡絲履頭上玳瑁光腰若流
紈素耳著明月璫指如削葱根口如含朱丹纖纖作細
步精妙世無雙上堂謝阿母母聽去不止昔作女兒時
生小出野里本自無教訓兼愧貴家子受母錢帛多不
堪母驅使今日還家去念母勞家裏卻與小姑別淚落
連珠子新婦初來時小姑如我長勤心養公姥好自相

扶將初七及下九嬉戲莫相忘出門登車去涕落百餘
行府吏馬在前新婦車在後隱隱何甸甸俱會大道口
下馬入車中低頭共耳語誓不相隔鄉且暫還家去吾
今且赴府不久當還歸誓天不相負新婦謂府吏感君
區區懷君既若見錄不久望君來君當作磐石妾當作
蒲葦蒲葦紉如絲磐石無轉移我有親父兄性行暴如
雷恐不任我意逆以煎我懷舉手長勞勞二情同依依
入門上家堂進退無顏儀阿母大拊掌不圖子自歸十

三教汝織十四能裁衣十五彈箏篴十六知禮儀十七遣汝嫁謂言無讐違汝今無罪過不迎而自歸蘭芝慙阿母兒實無罪過阿母大悲摧還家十餘日縣令遣媒來云有第三郎窈窕世無雙年始十八九便言多令才阿母謂阿女汝可去應之阿女銜淚答蘭芝初還時府吏見丁寧結誓不別離今日違情義恐此事非奇自可斷來信徐徐更謂之阿母白媒人貧賤有此女始適還家門不堪吏人婦豈合令郎君幸可廣問訊不得便相

許媒人去數日尋遣承請還誰有蘭家女承籍有宦官
云有第五郎嬌逸未有婚遣承為媒人主簿通語言直
說太守家有此令郎君既欲結大義故遣來貴門阿母
謝媒人女子先有誓老姥豈敢言阿兄得聞之悵然心
中煩舉言謂阿妹作計何不量先嫁得府吏後嫁得郎
君否泰如天地足以榮汝身不嫁義郎體其佳欲何云
蘭芝仰頭答理實如兄言謝家事夫壻中道還兄門處
分適兄意那得自任專雖與府吏要渠會永無緣登即

相許和便可作婚姻媒人下牀去諾諾復爾爾還部白
府君下官奉使命言談大有緣府君得聞之心中大歡
喜視歷復開書便利此月內六合正相應良吉三十日
今已二十七卿可去成婚交語速裝束絡繹如浮雲青
雀白鵲舫四角龍子幡婀娜隨風轉金車玉作輪躑躅
青驄馬流蘇金鏤鞍齎錢三百萬皆用青絲穿雜綵三
百匹交廣市鮭珍從人四五百鬱鬱登郡門阿母謂阿
女適得府君書明日來迎汝何不作衣裳莫令事不舉

阿女默無聲手中掩口啼淚落便如瀉移我瑠璃榻出
置前牕下左手持刀尺右手執綾羅朝成繡袂裙晚成
單羅衫晝晝日欲暝愁思出門啼府吏聞此變因求假
暫歸未至二三里摧藏馬悲哀新婦識馬聲躡履相逢
迎悵然遙相望知是故人來舉手拍馬鞍嗟嘆使心傷
自君別我後人事不可量果不如先願又非君所詳我
有親父母逼迫兼弟兄以我應他人君還何所望府吏
謂新婦賀卿得高遷磐石方可厚可以卒千年蒲葦一

時紉便作旦夕間卿當日勝貴吾獨向黃泉新婦謂府吏何意出此言同是被逼迫君爾妾亦然黃泉不相見忽違今日言執手分道去各各還家門生人作死別恨恨那可論念與世間辭千萬不復舍府吏還家去上堂拜阿母今日大風寒寒風摧樹木嚴霜結庭蘭兒今日冥冥令母在後單故作不良計勿復怨鬼神命如南山石四體康且直阿母得聞之零淚應聲落汝是大家子仕宦於臺閣慎勿為婦死貴賤情何薄東家有賢女窈

窈豔城郭阿母為汝求便復在旦夕府吏再拜還長嘆
空房中作計乃爾立轉頭向戶裏漸見愁煎迫其日牛
馬嘶新婦入青廬奄奄黃昏後寂寂人定初我命絕今
日魂去尸長留攬裙脫絲履舉身赴清池府吏聞此事
心知長別離徘徊庭樹下自掛東南枝兩家求合葬合
葬華山傍東西植松柏左右種梧桐枝枝相覆蓋葉葉
相交通中有雙飛鳥自名為鴛鴦仰頭相向鳴夜夜達
五更行人駐足聽寡婦赴傍徨多謝後世人戒之慎勿

忘

盧女曲

崔顥

樂府解題曰盧女者魏武帝時宮人也故
將軍陰升之姊七歲入漢宮善鼓琴至明
帝崩後出嫁為尹更生妻梁簡文帝妾薄
命曰盧姬嫁日晚非復少年時蓋傷其嫁
遲也

二月春來半宮中日漸長柳垂金屋暖花覆玉樓香拂

匣先臨鏡調笙更灸黃還將盧女曲夜夜奉君王

盧姬篇

崔顥

盧姬小小魏王家綠髮紅脣桃李花魏王綺樓十二重
水精簾箔繡芙蓉白玉闌千金作柱樓上朝朝學歌舞
前堂後堂羅袖人南牕北牕花發春翠幌珠簾鬪絃管
一奏一彈雲欲斷君王日晚下朝歸鳴環珮玉生光輝
人生今日得驕貴誰道盧姬身細微

邯鄲才人嫁為廝養卒婦謝眺

生平宮閣裏出入侍丹墀開筭方羅縠窺鏡比蛾眉初
別意未解去久日生悲顚顚不自識嬌羞餘故姿夢中
忽髣髴猶言承讌私

同前

李白

妾本叢臺女揚蛾入丹闕自倚顏如花寧知有凋歇一
辭玉階下去若朝雲沒每憶邯鄲城深宮夢秋月君王
不可見惆悵至明發

楊白花

梁書曰楊華武都仇池人也少有勇力容貌雄偉魏胡太后逼通之華懼及禍乃率其部曲來降胡太后追思之不能已為作楊白華歌辭使宮人晝夜連臂蹋足歌之聲甚悽惋故南史曰楊華本名白花奔梁後名華魏名將楊大眼之子也

陽春二三月楊柳齊作花春風一夜入閨闈楊花飄蕩落南家含情出戶脚無力拾得楊花淚沾臆秋去春還

雙燕子願銜楊花入窠裏

同前

柳宗元

楊白花風吹度江水坐令宮樹無顏色
搖蕩春光千萬里茫茫曉日下長秋
哀歌未斷城鷄起

茱萸女

梁簡文帝

茱萸生狹斜結子復銜花
遇逢纖手摘濫得映鈿華
雜與鬟簪插偶逐髮鈿斜
東西爭贈玉縱橫來問家
不無夫壻馬空駐使君車

同前

萬楚

山陰柳家女九日採茱萸復得東隣伴雙為陌上妹挿
花向高髻結予置長裾作性恒遲緩非關婉丈夫平明
折林樹日入反城隅俠客邀羅袖行人挑短書蛾眉自
有主年少莫踟躕

舞媚娘二首

陳後主

樂苑曰舞媚娘大舞媚娘竝羽調曲也唐
書曰高宗永徽末天下歌舞媚娘未幾立

武氏為皇后按陳後主已有此歌則永徽
所歌蓋舊曲云

樓上多嬌豔當牕併三五爭弄遊春陌相邀開繡戶轉
態結紅裙含嬌拾翠羽留賓乍拂弦託意時移柱

淇水變新臺春鑪當夏開玉面含羞出金鞍排夜一作暗來

來春日多一作好風光尋觀向一作戲市傍轉身移佩響牽

袖起衣香

同前

庾信

朝來戶前照鏡含笑盈盈自看眉心濃黛直點額角輕
黃細安祗疑落花謾去復道春風不還少年唯有懽樂
飲酒那得留殘

于闐採花

山川雖異所草木尚同春亦如溱洧地自有採花人

同前

李白

于闐採花人自言花相似明妃一朝西入胡胡中美女
多羞死乃知漢地多名姝胡中無花可方比丹青能令

醜者妍無鹽翻在深宮裏自古妬蛾眉胡沙埋皓齒

秦王卷衣

吳均

樂府解題曰秦王卷衣言咸陽春景及宮
闕之美秦王卷衣以贈所歡也唐李白有
秦王卷衣

咸陽春草芳秦帝卷衣裳玉檢茱萸匣金泥蘇合香初
芳薰複帳餘輝耀玉牀當須晏朝罷持此贈龍

一作華

陽

秦女卷衣

李白

天子居未央妾侍

一作來

卷衣裳顧無紫宮寵敢拂黃金

牀水至亦不去熊來尚可當微身奉

一作捧

日月飄若螢

火光願君採葑菲無以下體妨

愛妾換馬

梁簡文帝

樂府解題曰愛妾換馬舊說淮南王所作
疑淮南王即劉安也古辭今不傳

功名幸多種何事苦生離誰言似白玉定是媿青驪必
取匣中劍迴作飾金羈真成恨不已願得路傍兒

同前

劉孝威

驄馬出樓蘭一步九盤桓小史贖金絡良工送玉鞍龍
驂來甚易烏孫去實難麟膠妾猶有請為急弦彈

同前

庾肩吾

渥水出騰駒湘川實應圖來從西北道去逐東南隅琴
聲悲玉匣山路泣蘼蕪似鹿將含笑千金會不俱

同前

僧法宣

朱鬣飾金鑣紅妝束素腰似雲來蹀躞如雪去飄飄桃

花含淺汗柳葉帶餘嬌
騁先將獨立雙絕不俱標

同前

張祐

一面妖桃千里蹄
嬌姿駿骨價應齊
乍牽玉勒辭金棧
催整花鈿出繡闥
去日豈無沾袂泣
歸時還有頓銜嘶
嬋娟躑躅春風裏
揮手搖鞭楊柳堤

綺閣香銷華廐空
忍將行雨換追風
休憐柳葉雙眉翠
卻愛桃花兩耳紅
侍宴永辭春色裏
趨朝休立漏聲中
恩勞未盡情先盡
暗泣嘶風兩意同

樂府詩集卷七十三

欽定四庫全書薈要卷一萬九千七百八十七

集部

樂府詩集卷七十四

宋 郭茂倩 編

雜曲歌辭

枯魚過河泣

古 辭

枯魚過河泣何時悔復及作書與魴鱖相教慎出入

同前

李 白

白龍改常服偶被豫且制誰使爾為魚徒勞訴天帝作

書報鯨鯢勿恃風濤勢
濤落歸泥沙
翻遭螻蟻噬
萬乘
慎出入
柏人以為誠

一作識

冉冉孤生竹

古辭

冉冉孤生竹
結根泰山阿
與君為新婚
菟絲附女蘿
菟絲生有時
夫婦會有宜
千里遠結婚
悠悠隔山陂
思君令人老
軒車來何遲
傷彼蕙蘭花
含英揚光輝
過時而不采
將隨秋草萎
君亮執高節
賤妾亦何為

同前

何偃

流萍依清源孤鳥親宿止蔭幹相經榮風波能終始草
生有日月婚年行及紀思欲侍衣裳關山分萬里徒作
春夏期空望良人軌芳色宿昔事誰見過時美涼鳥臨
散一作秋竟歡願亦云已豈意倚君恩坐守零落耳

棗下何纂纂

梁簡文帝

古吐唱歌曰棗下何攢攢榮華各有時棗
欲初赤時人從四邊來棗適今日賜誰當
仰視之潘安仁笙賦曰詠園桃之夭夭歌

棗下之纂纂歌曰棗下纂纂朱實離離宛
其死矣化為枯枝纂纂棗花也棗之纂纂
盛貌實之離離將衰言榮謝之各有時也
垂花臨碧澗結翠依丹巘非直入游宮兼期植靈苑落
日芳春莫遊人歌吹晚弱刺引羅衣朱實凌還憶且歡
洛浦詞無羨安期遠

同前二首

王 甫

柳黃知節變草綠識春歸
複道含雲影重簷照日輝

御柳長條翠宮槐細葉開還得聞春曲
便逐鳥聲來

西園遊上才

沈約詠月詩曰月華臨靜夜夜靜滅氛埃
方暉竟戶入圓影隙中來高樓切思婦西
園遊上才因以為題也

西園遊上才清夜可徘徊月桂臨樽上山雲影益來飛
花隨燭度疎葉向帷開當軒顧應阮還覺賤鄒枚

薄莫動弦歌

沈君攸

柳谷向夕沉餘日蕙樓臨砌徙斜光金戶半入藂林影
蘭徑時移落藥香絲繩玉壺傳綺席秦箏趙瑟響高堂
舞裙拂履喧珠珮歌響出扇繞塵梁雲邊雪飛弦柱促
留賓但須羅袖長日暮歌鍾恒不倦處處行樂為時康
羽觴飛上苑

沈君攸

楚辭曰瑤漿密勺實羽觴張衡西京賦曰
促中堂之狹坐羽觴行而無算羽觴謂杯
上綴羽以速飲漢書音義曰羽觴作生爵

形是也

上路薄晚風塵合禁苑初春氣色華石徑斷絲蘭蔓草
山流細沫擁浮花魚文熠燿含餘日鶴蓋低昂照落霞
隔樹銀鞍喧寶馬分衢玉軼動香車車馬處處盡成陰
班荆促席對芳林藤杯屢動情仍暢翠樽引滿趣彌深
山陽倒載非難得宜城醇醞促須斟半醉驪歌應可奏
上客莫慮擲黃金

桂檝泛河中

沈君攸

黃河曲渚通千里濁水分流引八川仙查逐源終未極

蘇亭

一作漢帝

遺跡尚難遷眇眇雲根侵遠樹蒼蒼水氣雜

一作合

遙天波影雜霞無定色湍文觸岸不成圓赤馬青

龍

一作驪

交出浦飛雲蓋海遠凌煙蓮舟渡沙轉不礙桂

檝距浪弱難前風急金鳥翅自轉汀長錦纜影微懸榜
人欲歌先扣柂津吏猶醉彊持船河隄極望今如此行
杯落葉詎虛傳

內殿賦新詩

江總

兔影脉脉照金鋪
虬水滴滴寫玉壺
綺翼雕甍邇清漢

虹梁紫

一作桂

柱麗黃圖風高暗綠凋殘柳
雨駛芳紅溼

晚笑三五二八佳
年少百萬千金買
歌笑偏羞

一作著故

人織素詩願奉秦聲采蓮

一作菱

調織女今夕渡銀河當

見清

一作新

秋停玉梭

武溪深行

馬援

一曰武陵深行崔豹古今註曰武溪深馬

援南征之所作也援門生爰寄生善吹笛

援作歌令寄生吹笛以和之名曰武溪深
滔滔武溪一何深鳥飛不度獸不敢臨嗟哉武溪兮多
毒淫

同前

劉孝勝

武溪深不測水安舟復輕暫侶莊生釣還滯鄂君行櫂
歌爭後發譟鼓逐前征秦上山川險黔中木石并林壑
秋籟急猿哀夜月明澄源本千仞回峰忽萬縈昭潭讓
無底太華推削成日落野通氣目極悵餘情下流曾不

濁長邁寂無聲羞學滄浪水濯足復濯纓

半渡溪

劉孝威

樂府解題曰半渡溪言戰而半涉溪水見
迫所言皆嶺南地里與武溪深相類梁元
帝又有半路溪則言相逢隔溪已識行步
辭旨與此全殊

本厠偏伍伴一戰殄凶渠制賜文犀節驛報紫泥書入
營陳御蓋還家乘紫車皇恩空以重

一作知
已重

丹心恨不

紆渡瀘且不畏凌溪嗟有餘

半路溪

梁元帝

相逢半路溪隔溪猶不渡望望判知是翩翩識行步摘
贈蘭澤芳欲表同心句先將一作持動舊情恐君疑妾妬

昔思君

傅玄

昔君與我兮形影潛結今君與我兮雲飛雨絕昔君與
我兮音響相和今君與我兮落葉去柯昔君與我兮金
石無虧今君與我兮星滅光離

妾安所居

吳均

賤妾先有寵蛾眉進不遲一從西北麗無復城南期何
因暫豔逸豈為乏妍姿徒有黃昏望寧遇青樓時惟惜
應門掩方餘永巷悲匡牀終不共何由橫自思

飲酒樂

陸機

樂苑曰飲酒樂商調曲也

蒲萄四時芳醇瑠璃千鍾舊賓夜飲舞遲銷燭朝醒弦
促催人

同前

飲酒須飲多人生能幾何百年須受樂莫厭管弦歌

同前

聶夷中

日月似有事一夜行一周草木猶須老人生得無愁一
飲解百結再飲破百憂白髮欺貧賤不入醉人頭我願
東海水盡向杯中流安得阮步兵同入醉鄉遊

淫思古意

顏竣

春風飛遠方紀轉流思堂貞節寄君子窮閨妾所藏裁

書露微疑千里問新知君行過三稔故心久當移

思公子

王融

楚辭九歌曰雷填填兮雨冥冥援啾啾兮
狄夜鳴風颯颯兮木蕭蕭思公子兮徒離
憂思公子蓋出於此

春盡風颯颯蘭凋木脩脩王孫久為客思君徒自憂

同前

費昶

公子才氣饒凌雲自飄飄東出關雞道西登飲馬橋夕

宴銀為燭朝燔桂作焦虞卿亦何命窮極苦無聊

同前

邢劭

綺羅日減帶桃李無顏色思君君未歸歸來豈相識

王孫遊

謝朓

楚辭招隱士曰王孫遊兮不歸春草生兮
萋萋王孫遊蓋出於此

綠草蔓

一作夢

如絲雜樹紅英發無論君不歸君歸芳已

歇

同前

王融

置酒登廣殿開襟望所思春草行已歇何事久佳期

一本

辭同思

公子

同前

崔國輔

自與王孫別頻看黃鳥飛應由春草誤著處不成歸

陽翟新聲

王融

隋書樂志曰西涼樂曲陽翟新聲神白馬之類皆生於胡戎歌非漢魏遺曲也

懷春發下蔡含笑向陽城恥為飛雉曲好作鷓鴣鳴

金樂歌

梁簡文帝

槐香欲覆井楊柳正藏鴟山鑪當

一作好

無比玉構火聰

賒牀頭辟繩結鏡上領巾斜鐵鍾種梁子銅樞生秦花

開門拋水柱

一作信

城按特言家

同前

梁元帝

啼鳥怨別偶曙鳥憶誰家石闕題書字金燈飄落花東
方曉星沒西山晚日斜縠衫迴廣袖團扇掩輕紗暫借

青驄馬來送黃牛車

同前

房篆

前溪流碧水後渚映青天登臺臨寶鏡開牕對綺錢玉
顏光粉色羅袖拂金鈿春風散輕蝶明月映新蓮摘花
競時侶催指及芳年

樂未央

沈約

億舜日萬堯年詠湛露歌採蓮願雜百和氣宛轉金鑪
前

南征曲

蕭子顯

櫂歌來楊女操舟驚越人
圖蛟怯水伯照鷁竦江神

發白馬

費祖

通典曰白馬春秋時衛國曹邑有黎陽津
一曰白馬津酈生云守白馬之津是也發
白馬言征戍而發兵於此也

家本樓煩俗名募羽林兒怖羗角觝戲習戰昆明池弓
弦不復挽劍衣恒露鍔一辭豹尾內長別屬車垂白馬

今雖發黃河未結斯寄言閨中婦逢春心勿移

同前

李白

將軍發白馬旌節渡黃河簫鼓聒川嶽滄溟湧洪一作濤

波武安有振瓦易水無寒歌鐵騎若雪山飲流涸淳沲
揚兵獵月窟轉戰略朝那倚劍登燕然邊峰列嵯峨蕭
條萬里外耕作五原多一掃清大漠包虎戢金戈

濟黃河

謝微

積陰晦平陸淒風結莫序朝辭金谷戍夕逗黃河渚赤

免徒聯翩青鳬詎容與淚甚聲難發悲多袖未舉虛薄
謬君恩方嗟別宛許

同前

江總

蔥山淪外城鹽澤隱遐方兩京分際遠九道派流長未
殫所聞見無待驗詞章留連嗟太史惆悵踐黎陽導波
縈地節疏氣耿天潢憫周闕用寶嘉晉肇為梁

同前

蕭慤

大蕃連帝室驂駕奉皇猷未明驅羽騎凌晨方畫舟津

城度維錦岸柳夾緹油鍾聲颺別島旗影照蒼流早光
生劍服朝風起節樓滔滔細波動裔裔輕舳浮迴橈避
近磧放舳下前洲全疑上天漢不異謁蓬丘望知雲氣
合聽識水聲秋從軍何等樂喜從神仙遊

結襪子

溫子昇

帝王世紀曰文王伐崇侯虎至五鳳墟襪
係解顧左右無可使者乃俯而結之武王
至商郊牧野誓衆左仗黃鉞右秉白旄王

襪解莫肯與王結王乃釋旄俯而結之漢書曰王生者善為黃老言處士嘗召居廷中公卿盡會立王生老人曰吾韞解顧謂張釋之為我結韞釋之跪而結之既已人或讓王生獨奈何廷辱張廷尉如此王生曰吾老且賤自度終亾益於張廷尉廷尉方天下名臣吾故聊使結襪欲以重之諸公聞之賢王生而重釋之唐李白辭大抵

言感恩之重而以命相許也

誰能訪故劍會自逐前魚裁紃終委篋織素空有餘

同前

李白

燕南壯士吳門豪筑中置鉞魚隱刀感君恩重許君命
太山一擲輕鴻毛

沐浴子

澡身經蘭汜濯髮倭芳洲折榮聊躑躅攀桂且淹留

同前

李白

沐芳莫彈冠浴蘭莫振衣處世忌太潔志

一作至

人貴藏

暉滄浪有釣叟吾與爾同歸

安定侯曲

溫子昇

封疆在上地鍾鼓自相和美人當牕舞妖姬掩扇歌

澤雉

莊子曰澤雉十步一啄百步一飲不期畜
乎樊中澤雉曲蓋取此也古今樂錄曰鳳
將雛以澤雉送曲

擅場延繡頸朝飛弄綺翼飲啄常自在驚雄恒不息

短簫

張嶷

促柱弦始繁短簫吹初亮舞袖拂長席鍾音由簾颺已
落簷瓦間復繞梁塵上時屬清夏陰恩暉亦非望

伍子胥

鮑機

忠孝誠無報感義本投身日莫江波急誰憐漁丈人楚

墓悲猶

一作空

在吳門恨

一作怨

未申

清涼

張率

登臺待初景帳殿藹餘晨羅帷

一作帳

夕風濟清氣尚波

人長簟涼可仰平莞溫未親幸願同枕席為君橫自陳



樂府詩集卷七十四



總校官進士臣胡榮

校對官待詔臣胡士震

校對官編修臣裴謙

謄錄監生臣王詢

謄錄監生臣劉銓瑛